



奉茶

有一個和尚帶等一個徒弟，離開寺廟到外莊化緣。有一日，天時異熱，堵堵上到一隻山崑崎頂；兩儕就在崎頂茄冬樹下寮涼，樹下一隻奔蓋个醃缸，醃缸外緣貼等「奉茶」兩隻字；邊脣放等一只掛柄个竹笕杯仔。細和尚該央時又熱又渴，遽遽拿起杯仔就愛舀水落嘴。毋過，打開醃缸蓋一看，缸肚裝等一桄樹杷，茶水面項還有薯糠浮浮冇冇；細和尚看著，趕緊喊厥師父來看，講：「恁樣个茶水愛仰仔食；這煮茶个人毋單止無誠意，還做得講係壞心哩啲。」老和尚笑笑仔同厥徒弟講：「這煮茶个人毋單止當有誠意，還係一個有心人。茶水肚項放个樹杷係杌仔樹心，比放茶米還較有生津止渴个功效；放薯糠係喊你食茶愛細細口仔食，上到這崎頂个人，全部都行到氣急急，係大口食水，盡傷身；還有該支竹笕杯仔，又乜係喊人毋好食忒猛个作用。」

「食茶」係人間个文化，毋單單為著止渴，還係一種禮儀个表相。在客人个家庭，無論貴賤，「泡茶」係招待人客个基本禮數。屋下係有人客來，先倒「洗面水」分人客洗手；跔等大人就會喊細人仔去灶下焗滾水來泡茶，一方面教細人仔仰般泡茶，一方面乜教細人仔招待人客个規矩。平常時係有三朋兩友來寮，「泡茶」就係盡有誠意个招待。邀請人客來寮該下，「有閒來吾屋下泡茶」係異大般个應接話語。講著奉茶也有分身分高低个等級。在宋朝歷史上就有留傳一段蘇東坡探訪禪師个故事——有一日，蘇東坡打扮白身去拜訪一位禪師，禪師看佢身裝無見奇，就喊家僮奉「茶」，蘇東坡看佢恁勢利眼，以衣裳取人，就在香油簿項題一百兩銀，該禪師看著，跔等改嘴喊家僮「上茶」，續等蘇東坡過在簿面寫下「蘇東坡」三隻字，禪師看著著驚一下，無想著眼前打扮村夫樣仔个人係大粒人，遽遽喊家僮「上好茶」。

講著「奉茶」个禮數：屋下係有服侍神明或者祖先，細俵人打早䟽床，洗好手面，就愛先焗滾水來「泡神茶」；屋下附近仔係有「伯公廟」乜愛泡便茶到廟項焗神茶並上香。「奉茶」在男女婚嫁个儀式中乜有相當个分量，比論講「定婚」儀式，男女雙方決定共結連理，就會選定吉日定婚。男家頭準備聘禮，到女家頭行定婚禮。進行儀式中間，準新娘「扛茶」奉客係主要行程；該時節，男家頭由準家官、家娘領頭，準新郎座尾，準新娘照順序奉上「甜茶」，並由媒人紹介各各个身分分新娘認識；收茶杯該下，男方賓客愛用金器或紅包「砵杯底」。還過在男女行結婚典禮當日食飽夜，還有「食新娘茶」个齣事，一般係新郎个兄弟友朋來「鬧洞房」，共樣由新娘「扛茶」奉客，每一個「賓客」愛「講四句」，無就祝福个話，食忒「新娘茶」，共樣愛用紅包「砵杯底」。

作者：龔萬灶

☆詞彙學習☆

- | | |
|----------------------------------|-------------------------------|
| 【山崑】 san' gien：山頂鞍部。 | 【焗滾水】 pu' gun' sui'：煮開水。 |
| 【奔蓋】 giem' goi：蓋上蓋子。 | 【大般】 tai ban'：大方。 |
| 【醃缸】 am' gong'：陶製水缸。 | 【無見奇】 mo' gien ki'：沒什麼奇特處。 |
| 【竹笕】 zug' gong'：竹節。 | 【跔等】 ten' den'：隨即。 |
| 【樹杷】 su pa'：樹枝。 | 【焗神茶】 tin' siin' ca'：斟上敬神的茶水。 |
| 【薯糠】 lung' hong'：穀殼。 | 【砵杯底】 zag' bi' dai'：把紅包壓放在杯裡。 |
| 【浮浮冇冇】 po' po' pang pang：在水面漂浮著。 | 【齣事】 cud' sii：節目、事情。 |